

Nam b' urrainn dhut na lusan gu lèir anns a' choille a chunntadh, agus an uair sin na beathaichean gu lèir a chunntadh agus an cuir ann am buidhnean a rèir 's an e lus-itheadairean no feòil-itheadairean a bh' annta, thòisicheadh an cearcall-bìdhe agad a' coimhead coltach ri biorramaid.

Chan eil lus-itheadairean cho pailt ris na lusan a bhitheas iad ag ithe no cha bhitheadh e fada gus an itheadh iad am biadh gu lèir. Mar sin, chan eil uiread de fheòil-itheadairean ann an taca ris na lus-itheadairean a bhitheas iadsan ag ithe. Tha na feòil-itheadairean mòra agus as annasaich a th' ann aig an fhìor mhullach.

'S e biorramaid àireamhan a chanas sinn ri seo agus tha seo fìor mu àrainn sam bith ris an coimhead thu. Bithidh na lusan agus na beathaichean eadar-dhealaichte oir chan urrainn don chuid mhòr de bheathaichean na coille a bhith beò air mullach beinne no air a' chladach agus chan urrainn do na beathaichean anns na h-àiteachan sin a bhith beò anns a' choille.

Ⓒ Faodaidh tu modal de chearcall-bìdhe a dhèanamh le cumaidhean nam beathaichean a ghearradh a-mach à cairt thana. Cum simplidh e agus na cleachd ach na seòrsachan bheathaichean air a bheil cumaidhean eadar-dhealaichte.

Tòisich le speireag aig a' mhullach agus ceangal i ri slat chaol, thana. Ceangail trì no ceithir a shnàithleanan, a tha mu cheithir oirlich a dh'fhad, ris an t-slat seo. Fàg beàrn eadar na snaidhleanan. An uair sin ceangal dealbh de m.e. cailleachag-cheann-ghorm, smeòrach, cam-ghob agus snagan daraich, 's gach fear air slat ghoirid dha fhèin. An uair sin ceangal trì no ceithir snaidhleanan goirid le cumadh meanbh-fhrìde ceangailte ri gach fear ri gach slat ghoirid.

Tha thu a-nis air cearcall-bìdhe no lìon-bìdhe na coille a dhèanamh dhut fhèin. Faodaidh tu a chrochadh bho mhullach an ruim mar ghluaiseadair.

